

摛藻堂四庫全書薈要

集部

欽定四庫全書

卷二萬二百九十五

集部

宋詩鈔卷四十二

內閣中書舍人吳之振編

陳與義簡齋集鈔上

與義字去非號簡齋汝州葉縣人登上舍甲科歷太
學博士擢符寶郎尋謫監陳留酒稅南渡後避亂襄
漢轉湖湘踰嶺嶠名為兵部員外郎紹興中累官翰
林學士知制誥至參知政事卒年四十九少學詩於

崔德符問作詩之要崔曰工拙所未論大要忌俗而已嘗賦墨梅受知徽宗遂登冊府高宗尤喜其客子光陰詩卷裏杏花消息雨聲中之句天分既高用心亦苦意不拔俗語不驚人不輕出也晚年益工旗亭傳舍摘句題寫殆徧號稱新傑體物寓興清邃紓徐高舉橫厲上下陶謝韋柳之間劉後村謂元祐後詩人迭起不出蘇黃二體及簡齋始以老杜為師建炎間避地湖嶠行萬里路詩益奇壯造次不忘憂愛以簡

嚴掃繁縟以雄渾代尖巧第其品格當在諸家之上
劉須溪序其詩亦謂較勝黃陳比東坡云如論花高
品則色不如香逼真則香不如色其推崇如此簡齋
自言曰詩至老杜極矣蘇黃復振之而正統不墜東
坡賦才大故解縱繩墨之外而用之不窮山谷措意
深故游泳玩味之餘而索之益遠要必識蘇黃之所
不為然後可以涉老杜之涯涘味此足以定其品格
矣簡齋晚年讀書吾邑之間鄉有遺蹟云

次韻謝文驥主簿見寄兼示劉宣教

斷蓬隨天風飄蕩去何許寒草不自振生死依牆堵兩塗俱寂寞衆手劇雲雨坐令習主簿不與雞鶩伍遙知竹林交未肯一時數翩翩三語掾智與慢相補翼劉吾所畏道屈空去魯子才亦落落傾蓋極許予四夢照河濱一笑寬逆旅堂堂吾景方張儀
援字去作泉下土未知我露電能復幾寒暑思尊久未決食齋轉覺苦我不逮諸子要先諸子去不種楊惲田但灌呂安圃未知誰善釀

可作孔文舉十年亦晚矣請便事斯語

來詩有十
年之約

次韻周教授秋懷

一官不辨作生涯幾見秋風捲岸沙宋玉有文悲落木
陶潛無酒對黃花天機衮衮山新瘦世事悠悠日自斜
誤矣載書三十乘東門何地不宜瓜

次韻張矩臣迪功見示建除體

建德我故國歸哉遙我驅除道得歡伯荆棘無復餘滿
懷秋月色未覺飢腸虛平林過西風為我起笙竽定知

張公子能共寂寞娛執此以贈君意重貉裙褕破帽與
青鞋耐久心亦舒危處要進步安處勿停車成虧在道
德不在功利區收視以為期問君此何如開樽且復飲
辭費道已迂閉口味更長香斷窓櫺疎

題牧牛圖

千里煙草綠連山雨新足老牛抱朝飢向山影駁駢犢
兒狂走先過浦却立長鳴待其母母子為人實倉廩汝
飽不慙人愧汝牧童生來日日娛只憂身大當把鋤日

斜睡足牛背上不信人間有廣輿

江南春

雨後江上綠客悲隨眼新桃花十里影搖蕩一江春朝
風逆船波浪惡暮風送船無處泊江南雖好不如歸老
齊遼牆人得肥

蠟梅

智瓊額黃且勿誇回眼視此風前葩家家融蠟作杏蒂
歲歲逢梅是蠟花世間真偽非兩法映日細看真是蠟

我今嚼蠶已甘腴况此有韻蠶不如只愁繁香欺定力
薰我欲醉須人扶不辭花前醉倒卧經月是酒是香君
試別

次韵張元方春雪

雲黃天為低窻白雪初作幽人睡方覺簾外舞萬鶴斜
斜既可人整整亦不惡不知來何暮遂失梅花約東風
桃杏暖不受珠璣絡聊迴萬斛潤點點付藜藿幽人無
酒飲一笑供酬酢歲晚會復來相期在丘壑

雜書示陳國佐胡元茂四首

一官專為口俯仰汗我顏顧將千日飢換此三歲閒冥
冥雲表雁時節自往還不憂稻梁絕憂在羅網間絕勝
杜拾遺一飽當間關晚知儒冠誤猶戀終南山

杜門十日疾因得觀妄身勿云千金軀今視如埃塵平
生老赤脚每見生怒瞋揮汗煮我藥見此媿其勤

巨源邦之棟急士如拾珍定知柳下鍛遠勝崔史陳絕
交雖已謐益見叔夜真士要雖衣食求仁今得仁釋之

與王生盛美俱絕倫吾評竹林詠未可少若人

吾昔同年友壯志各南溟十年風雨過見此落落星秀者吾元茂衆器見鼎鉶許身稷高間不但醉六經時逢下車揖慰我兩眼青勿憂事不理伯始在朝廷

書懷示友十首

俗子令吾病紛然來座隅賢士費懷思不受折簡呼城東陳孟公久闊今何如明月照天下此夕與君俱不難十里勤畏借東家驢似聞有老眼能作薦鷁書功名勿

念我此心已埽除

陳孟公謂國佐

張子霜後鷹眉骨非凡曹不肯兄事錢但欲僕命驥胡
為隨我輩碌碌著青袍相逢車馬邊技癢不得搔

平生詩作崇腸肚困藿食使我忘隱憂亦自得詩力絕
知是餘蔽且復永今日不如付盃酒一笑萬事異毛頬
僅升堂麴生真入室

我夢鍾鼎食或作山林遊當其適意時略與人間侔覺
來跡便埽我已不悲憂人間安可比夢中無悔尤

我策三十六第一當歸田柴門種雜樹婆娑樂餘年是
中三益友不減二仲賢柏樹解說法桑葉能通禪

有錢可使鬼無錢鬼揶揄百年堂前燕萬事屋上鳥微
官不救飢出處違壯圖相牛豈無經種樹亦有書如何
求二頃歸卧淵明廬曝背對青山鳥鳴人意舒試數門
前客終歲幾覆車

仲舒老一經策世非所長瓦鼎薦蔬食但取充飢腸偉
哉賈生書開闔有耿光既珍亦可飽舉俗不見嘗

揚雄平生學肝腎因雕鎬晚於玄有得始悔賦甘泉使
雄早大悟亦何事於玄賴有一言善酒箴真可傳

蕭蕭十月菊耿耿照白草開窓逢一笑未覺徐娘老風
霜要飽更獨立晚更好韓公真躁人顧用憂懷抱

青青堂西竹歲寒不緇磷蓬蒿衆小中拭眼見長身澹
然冬日影此處極可人子猷幸見過一洗聲色塵

北風

北風掠野悲歲暮黃塵漲街人不度孤鴻抱飢客千里

性命么微不當怒梅花欲動天作難蓬飛上天得盤桓
千里卧木枝葉盡獨是人間不受寒

送張仲宗押載歸閩中

翩然鴻鵠本不羣亦復為口長紛紛去年弄影河北月
今年迎面江南雲還家不比陶令冷持節正效相如勤
青天白日映徒御玄髮絳旆明江漬舟前落花慰野老
浦口杜若愁湘君遙知詩成值驛使萬里春色當見分
贈人以言子豈敢不忍負子聊云云舊山雖好慎勿過

恐有德璋能勒文

襄邑道中

飛花兩岸照船紅
百里榆堤半日風
卧看滿天雲不動
不知雲與我俱東

寄新息家叔

風雨淮西夢危魂
費九升一官遮日手
兩地讀書燈見客
深藏舌吟詩不負
丞竹林雖有約
門戶要人興

年華

去國頻更歲為官不救餓春生殘雪外酒盡落梅時白
日山川映青天草木宜年華不負客一一入吾詩

茅屋

茅屋年年破春風歲歲來寒從草根退花值客愁開時
序添詩卷乾坤進酒盃片雲無思極日暮却空回

酴醿

雨過無桃李唯餘雪覆牆青天映妙質白日照繁香影
動春微透花寒韻更長風流到尊酒猶足助詩狂

秋雨

蕭蕭十日雨，穩送祝融歸。
燕子經年夢梧桐，昨暮非一涼。
恩到骨，四壁事多違。衰衰繁華地，西風吹客衣。

西風

木末西風起，中含萬里涼。
浮雲不愁思盡日，只飛揚夢斷頭。
將白詩成葉自黃，不關明主棄本出涸陰鄉。

題許道寧畫

滿眼長江水，蒼然何郡山。
向來萬里意，今在一窓間。
衆

木俱含暖孤雲遂不還此中有佳句吟斷不相關

和張矩臣水墨梅五絕

巧畫無鹽魄不除此花風韻更清殊從教變白能為黑
桃李依然是僕奴

病見昏花已數年只應梅蕊故依然誰教也作陳玄而
眼亂初逢未敢憐

粲粲江南萬玉妃別來幾度見春歸相逢京洛渾依舊
唯恨繙塵染素衣

含章簷下春風面造化功成秋兔毫意足不求顏色似
前身相馬九方皋

自讀西湖處士詩年年臨水看幽姿晴窓畫出橫斜影
絕勝前村夜雪時

夜雨

經歲柴門百事乖此身只合卧蒼苔蟬聲未足秋風起
木葉俱鳴夜雨來碁局可觀浮世理燈花應為好詩開
獨無宋玉悲歌念但喜新涼入酒盃

以事走郊外示友

二十九年知己非
今年依舊壯心違
黃塵滿面人猶去
紅葉無言秋又歸
萬里天寒鴻雁瘦
千村歲暮鳥烏微
往來屑屑君應笑
要就南池照客衣

十月

十月北風吹
歲闌九衢黃
土汙儒冠
歸鴉落日天
機熟老雁長
雲行路難
欲詣熟官憂
冷語且求濁酒
寄清歡孤吟坐
到三更月枯木
無枝不受寒

題小室

暫脫朝衣不當閒。澧州夢斷已多年。
諸公自致青雲上，病客長齋繡佛前。
隨意時為獅子卧，安心懶作野狐禪。
爐烟忽散無踪跡，屋上寒雲自黯然。

次韻張迪功春日

年年春日寒欺客，今日春無一半寒。
不覺轉頭逢歲換，便須揩眼待花看。
爭新遊女矯垂鬢，依舊先生日照盤。
從此不憂風雪厄，杖藜時可過蘇端。

又和歲除感懷用前韻

宦情吾與歲俱闌只有詩盟偶未寒
鬢色定從今夜改梅花已判隔年看高門名客車
稠疊下里燒香篆屈盤吾亦三盃聊復爾夢回
鶴鷺出朝端

即席重賦且約再遊

詩情不與歲情闘春氣猶兼水氣寒怪我問花終不語
須公走馬更來看共知浮世悲駒隙即見平波散芡盤
得一老兵雖可飲從今取友要須端

次韻家叔

衰衰諸公車馬塵先生孤唱發陽春黃花不負秋風意
白髮空隨世事新閉戶讀書真得計載肴從學豈無人
只應又被支郎笑從者依然困在陳

次韻答張迪功坐上見貽張將赴南都任二首

足錢便可不須俟免對妻兒賦百憂一笑相逢亦奇事
平生所得是清流談天安用如鄒子埽地還應學趙州
南北東西底非夢心閒隨處有直遊

千首能輕萬戶侯
誦君佳句解人愁
夢闌塵裏功名晚
笑罷尊前歲月流
世事無窮悲客子
梅花欲動憶吾州
明年又作河梁別
莫負平生馬少游

題畫兔

碎身鷹犬慙何忍
埋骨詩書事亦微
霜落深林可終歲
雄雌暖日莫忘機

寄塔拙弟兼呈二十家叔

退之送窮窮不去
樂天待富富不來
政須青山映黑髮

顧著皂蓋爭黃埃何如父子共一壑龐家活計良不惡
阿奴况自不碌碌白鷗之盟可同諾三間瓦屋亦易求
著子東頭我西頭中間共作老萊戲世上樂復有此不
問夢膏肓應已瘳歸來歸來無久留竹林步兵非俗流
為道此意思同遊

次韻謝表兄張元東見寄

平生張翰極風流好事工文妙九州燈裏偶然同一笑
書來已似隔三秋林泉入夢吾當隱花鳥催詩歲不留

安得清談一陶寫令人絕憶許文休

若拙弟說汝州可居已約卜一丘用韻寄元東

四歲冷官居漢地三年羸馬帝王州陶潛迷路已良遠
張翰思歸那待秋病鶴欲飛還躡躅孤雲將去更遲留
盍簪共結雞豚社一笑相從萬事休

次韻家弟碧線泉

九孔穿針可得過冰蠶映日吐寒波練飛空詠徐凝水
帶斷疑分漢帝河川后不愁微步襪鮫人暗動卷綃梭

才高下視玄虛賦對此區區轉患多

同家弟賦臘梅詩得四絕句

朱朱與白白著意待春開那知洞房裏已傍額黃來
韻勝誰能舍色莊那得親朝陽一映樹到骨不留塵
黃羅作廣袂絳帳作中單人間誰敢著留得護春寒
一花香十里更值滿枝開承恩不在貌誰敢鬪香來

連雨書事四首

九月逢連雨瀟瀟穩送秋龍公無乃倦客子不勝愁雲

氣昏城壁鐘聲咽寺樓年年授衣節牢落向他州

風伯方安卧雲師亦少養氣連河漢潤聲到竹松高老鶴尤貪去寒蟬遂不號相悲更相識滿眼楚人騷

塞入薪芻償連天兩眼愁生涯赤藤杖契分黑貂裘烏鵲無言暮蓬蒿滿意秋同時不同味世事劇悠悠

白菊生新紫黃蕪失舊青俱含歲晚恨併入夜深聽夢寐連蕭索更籌亂晦冥雲移過吳越應為洗餘腥

趙虛中有石名小華山以詩借之

君家蒼石三峰樣磅礴乾坤氣象橫皎子與山曾半面
小窓如夢慰平生爐煙巧作公超霧書冊尚避秦王城
病眼朝來欲開懶借君岩岫障新晴

次韻樂文卿北園

故園歸計墮虛空啼鳥驚心處處同四壁一身長客夢
百憂雙鬢更春風梅花不是人間白日色爭如酒面紅
且復高吟置餘事此生能廢幾詩筒

汝州吳學士觀我齋分韻得真字

狂夫縛軒冕自許稷契身靜者樂山林謂是羲皇人不
如兩忘快內保一色醇偉哉道山傑滯此汝水濱大來
會闊步小憇得幽欣一齋有琴酒萬事無繙磷不作子
公書肯受元規塵人言君侯癡我知丈人真月明泉聲
細雨過竹色新是間有真我宴坐方申申

古別離

東門柳年年歲歲征人手千人萬人於此別柳亦能堪
幾人折願君遄歸與君期要及此柳未衰時

蠟梅四絕

花房小如許銅切黃金塗中有萬斛香與君細細輸
來從底處所黃露滿衣濕緣憇翻得憐亭亭倚風立
奕奕金仙面排行立曉晴殷勤夜來雪少住作珠瓔
亭亭金步搖朝日明漢宮當時好光景一似此園中

錢東之教授惠澤州呂道人硯為賦長句

君不見銅雀臺邊多事土走上觚稜蔭歌舞餘香分盡
垢不除却寄書林汙縑楮豈如此瓦凝青膏冷而不識

妾雄曹呂翁已去泣餘泣通譜未許弘農陶幕年得君
真耐久摩挲玉質雲生手未知南越石虛中亦有文章
似君否西家撲滿本弟昆趣尚清濁何年分一朝墮地
真瓦礫莫望韓公無瘞文

述懷呈十七家叔

兒時學道逃悲歡只今未免憂飢寒浮生萬事蟻旋磨
冷官十年魚上竿竹林步兵亦忍辱長安閉門出無僕
門前故人擁廬兒政坐向來甘碌碌君不見古人有待

良不多利名溺人甚風波垂露成幃仲長統明月為燭
張志和塵中別多會日少世事欲談何可了曾中萬卷
已無用勸公留眼送飛鳥兩翁觀光今幾時賦歸有約
時已稽未暇藏身北山北且須覓地西枝西願從我翁
歸洗耳不用妓女汙山水肩輿亦莫要僕夫自有門生
與兒子

觀我齋再分韻得下字

一慵縛兩脚閉戶了晨夜夢攀城西樹起造君子舍紫

歸出堂堂見客披衣謝平生功名手嗜靜如食蔗小齋
劇冰壺中明外無罅要知日用事趺坐看鳥下主人心
了了竹石亦閒暇兒童慣看客我車當日駕平分齋中
閒風月不待借要須酒屢費不用牛心炙

歸洛道中

洛陽城邊風起沙征衫歲歲負年華歸途忽踐楊柳影
春事已到蕪菁花道路無窮幾傾轂牛羊既飽各知家
人生擾擾成底事馬上歌詩日又斜

道中寒食

斗粟淹吾駕浮雲笑此生有詩酬歲月無夢到功名客
裏逢歸雁愁邊有亂鶯楊花不解事更作倚風輕

龍門

不到龍門十載強斷崖依舊掛殘陽金銀佛寺浮佳氣
花木禪房接上方羸馬乍來還竟去流鶯多處最難忘
老僧不作留人意看水看山白髮長

秋夜

中庭淡月照三更
白露洗空河漢明
莫遣西風吹葉盡
却愁無處著秋聲

中牟道中二首

雨意欲成還未成
歸雲却作伴人行
依然壞郭中牟縣
千尺浮圖管送迎

楊柳招人不待媒
蜻蜓近馬忽相猜
如何得與涼風約
不共塵沙一併來

秋雨

塵起一月憂無禾瓦鳴三日憂雨多書生重口輕肝腎
不如牆角蚯蚓方長哦少昊行秋龍灑道風作萬木皆
商歌病夫強起開戶立萬箇銀竹驚森羅人間偉觀如
此少倚杖不覺泥及葦菊叢欹倒未足道老景知奈梧
桐何是事且置當務本菜園已添三萬科

遊葆真池上

牆厚不盈咫人間隔蓬萊高柳喚客遊我輩御風來坐
久落日近澹澹池光開白雲行水中一笑三徘徊鴨兒

輕歲月不受急景催試作弄蒿驚徐去首不迴無心與
境接偶遇信悠哉再來知何似有句端難裁

次韻王堯明郊祀顯相之作

奏書初不待衡譚奠璧都來萬玉參黃屋倚霄明半夜
紫壇承月眩諸龕聲喧大呂初終六影動玄圭陟降三
可是天公須羯鼓已迴寒馭作春酣

路歸馬上再賦

偶然思玉仙便到玉仙遊興盡未及郭玉仙失回頭成

毀俱一念今昔浪百憂未知橫笛子亦解此意不春風
所經過水色如潑油垂鞭看落日世事劇悠悠

來禽花

來禽花高不受折滿意清明好時節人間風日不貲春
昨夜臘脂今日雪舍東蕪菁滿眼黃胡蝶飛去專斜陽
妍媸都無十日事付與梧桐一夏涼

清明二首

街頭女兒雙髻鴉隨蜂趁蝶學妖邪東風也作清明節

開遍來禽一樹花

卷地風拋市井聲
病扶危坐了清明一簾晚日看收盡

楊柳微風百媚生

春日二首

朝來庭樹有鳴禽
紅綠扶春上遠林
忽有好詩生眼底
安排句法已難尋

憶看梅雪縞中庭
轉眼桃梢無數青
萬事一身雙鬢髮

竹床欹卧數箇襦

夏日集蓀真池上以綠陰生晝靜賦詩得靜字

清池不受暑幽討起予病長安車轍邊有此荷萬柄是
身唯可憇共寄無盡興魚遊水底涼鳥語林間靜談餘
日亭午樹影一時正清風不負客意重百金贈聊將兩
鬢蓬起照千丈鏡微波喜搖人小立待其定梁王今何
許柳色幾衰廬人生行樂耳詩律已其賸邂逅一尊酒
他年五君詠重期踏月來夜半嘯烟艇

道山宿直

離離樹子鵲驚飛獨倚枯筇無限時千丈虛廊貯明月
十分奇事更新詩人間路絕窓扉語天上雲空閣影移
遙想王戎燭下算百年辛苦一生癡

雨晴

天缺西南江面清纖雲不動小灘橫牆頭語鵲衣猶濕
樓外殘雷氣未平盡取微涼供穩睡急搜奇句報新晴
今宵勝絕無人共卧看星河盡意明

十月

十月天公作許悲負霜鴻雁不同飛
莽連萬里雲山去
紅盡千林秋徑歸病夫搜句了節序
小齋焚香無是非
睡過三冬莫閉戶北風不貸芰荷衣

漫郎

漫郎功業太悠然拄笏看山了十年黑白半頭明鏡裏
丹青千樹惡風前星霜屢費驚人句天地元須使鬼錢
踏破九州無一事只今分付結跏禪

柳絮

柳送腰肢日幾迴更教飛絮舞樓臺顛狂忽作高千丈
風力微時穩下來

登天清寺塔

為眼不計脚攀梯受微辛半天拍闌干驚倒地上人風
從萬里來老夫方岸巾荒荒春浮水浩浩空納塵夕陽
差萬瓦赤鯉欲動鱗須臾暮煙合青飭隱奩淪萬化本
日馳高處覺眼新借問龕中仙坐穩今幾晨俗子書滿
壁澹然不生嗔唯有太行山修供獨殷勤

浴室觀雨以催詩走羣龍為韻得走字

微雲生屋脊欹枕看培塿崔嵬亂一瞬泰華入搔首須臾萬銀竹壯觀驚戶牖摧擊竟自碎映空白煙走餘飄送未了日色在井口去冬三寸雪寒日澹相守商量細細融未覺經旬久誰能料天公辨此脫穎手一涼滿天地平分到庭柳葉端嘯餘風送我一杯酒畫屏題細字盡記同來友俗眼之所遺此事當不朽

夏至日與太學同舍會葆真二首

微官有閑閑三賦池上詩林客知夏深仰看天離離官忙負遠興觴至及良時荷氣夜來雨百鳥清晝遲微風不動頻坐看水色移門前爭奪場取歡不償悲欲歸未得去日暮多黃鸝

明波影千柳紺屋朝萬荷物新感節移意定覽景多遊魚聚亭影鏡面散微渦江湖豈在遠所欠雨一簞忽看帶箭禽三歎無奈何

秋試院將出書所寫窓

門前柿葉已堪書弄鏡燒香聊自娛百世窗明窗暗裏題詩不用著工夫

夏日

赤日可中庭樹影斂不開燭龍未肯忙一步九徘徊夢中驚耳鳴忽覺聞遠雷屋上奇峰起欹枕看雲來變化信難料轉頭失崔嵬雖然不成雨風起亦快哉槐葉萬背白少振十日埃白團豈辨此擲去羞薄才蜻蜓泊牆陰近人故多猜牆西豈更熱已去復飛迴

送王周士赴發運司屬官

寧食三斗塵有手不揖無詩人寧飲三斗醋有耳不聽
無味句牆東草深蘭發薰君先夢我我夢君小窓誦
詩燈花起窗外北風怒未已書生得句勝得官風其少
止盡人歡五更月暉一千丈明日君當泛淮浪去去三
十六策中第一買酒麌北風

試院書懷

細讀平安字愁邊失歲華疎疎一簾雨淡淡滿枝花投

老詩成癖經春夢到家茫然十年事倚杖數栖鴉

寄題兗州孫大夫絕塵亭

境空納浩蕩日暮生次寥竹聲池邊起欲斷還蕭蕭丈人方微吟萬象各動搖林間光景異月出東山椒門前誰剝啄已逝不須邀

休日早起

朧朧窓影來稍稍禽聲集開門知有雨老樹半身濕劇讀了無味遠遊非所急蒲團著身寬安取萬戶邑開鏡

白雲度捲簾
秋光入飽受
今日閒明朝
復羈紮

暮

長日無公事
閒園李遠暮
傍觀真一笑
互勝不移時
幸未逢重霸
何妨著獻之
晴天散飛雹
驚動隔牆兒

冬至二首

少年多意氣
老去一分無
閉戶了冬至
日長添數珠
北風不待節
鴻雁天南驅
烏帽獨何幸
七日守屋廬
石爐深炷火
撩亂一榻書
只可自怡悅
不堪寄張扶

人生本是客杜叟顧未知今年我聞道悲樂兩脫遺日
色如昨日未覺墉陰遲不須行年記異代尋吾詩東家
窈窕娘融蠟幻梅枝但恐負時節那知有愁時

西省酴醿架上殘雪可愛戲同王元忠席大光賦

詩

酴醿花底當年事夜雪糲糊照酒闌北省今朝枝上雪
還揩病眼作花看

對酒

新詩滿眼不能裁
鳥度雲移落酒杯
官裏簿書無日了
樓頭風雨見秋來
是非哀哀書生老
歲月匆匆燕子回
笑撫江南竹根枕
一尊呼起鼻中雷

後三日再賦

天生瘦木不須裁
說與兒童是酒杯
落日留霞知我醉
長風吹月送詩來
一官擾擾身增病
萬事悠悠首獨回
不奈長安小車得
睡鄉深處作奔雷

赴陳留二首

草草一夢闌行止本難期歲晚陳留路老馬三振髻自
看鞭袖影曠野日落遲柳林行不盡想見春風時點點
羊散村陣陣鴻投陂城中那有此觸處皆新詩舉手謝
路人醉語勿瑕疵我行有官事去作三年痴遙聞辟穀
仙閱世河水渭時從玩水影政爾不憂飢

馬上摩挲眼出門光景新鴉鳴半陂雪路轉一林春舊
歲有三日全家無十人平生鸚鵡蓋今夕最關身

至陳留

煙際亭亭墮招人可得回等閒為夢了聞健出關來日
落河水壯天長鴻雁哀平安遠遊意隨處一徘徊

客裏

客裏東風起逢人只四愁悠悠雜唯唯莫莫更休休
窓影鳥雙度水聲船逆流一官成一集盡付古河頭

對酒

陳留春色撩詩思一日搜腸一百迴燕子初歸風不定
桃花欲動雨頻來人間多待須微祿夢裏相逢記此杯

白竹扉前容醉舞煙村渺渺欠高臺

寒食

草草隨時事蕭蕭傍水門濃陰花照野寒食柳圍村客
袂空佳節鶯聲忽故園不知何處笛吹恨滿清尊

感懷

少日爭名翰墨場只今扶杖送斜陽青青草木浮元氣
渺渺山河接故鄉作吏不妨三折臂搜詩空費九迴腸
子房與我同羈旅世事千般酒一觴

寶園醉中前後五絕句

東風吹雨小寒生
楊柳飛花亂晚晴
客子從今無可恨
寶家園裏有鶯聲

海棠脉脉要詩催
日暮繁綿無數開
欲識此花奇絕處
明朝有雨試重來

不見海棠相似人
空題詩句滿花身
酒闌却度荒陂去
馳使風光又一春

三月碧桃驚動人
滿園光景一時新
勝傾老子尊中玉

折盡繁枝不要春

一尊相屬莫辭空報答今朝吹面風自唱新詩與明月

碧桃開盡雨聲中

雨

沙岸殘春雨茅簷古鎮官一時花帶淚萬里客憑欄日晚
薔薇重樓高燕子寒惜無陶謝手盡力破憂端

題酒務壁

野馬本不羈無奈卯與申當時彭澤令定是英雄人客

來兩繩牀客去一欠伸市聲自雜杳鑪煙自輪因鶯聲
時節改杏葉雨氣新佳句忽墮前追摹已難真自題西
軒壁不雜徐庾塵

秋夜詠月

庭樹日日疎稍覺夜月添推愁了此段卷我三間簾黃
花牆陰遠白髮露氣嚴平生六尺影隨我送涼炎踏破
千憂地投老乃自嫌尚想采石江宮錦映霜蟾夜半賦
詩成起舞魚龍兼辨此詎難事取快端宜廉

入城

竹輿聲伊鶴路轉登古原孟冬郊澤曠細水鳴蘆根寥
收浮屠立天澗鴻雁奔平生厭喧鬧快意三家村思生
長林內故園歸不存欲為唐衢哭聲出且復吞

夜步堤上三首

世故生白髮意行無與期平生水上座臨老始相知月
中沙岸永歲暮河流遲留侯廟前柳葉盡空離離百年
信難料勝賦奇絕詩

人間睡聲起幽子方獨步倚杖看白雲亭亭水中度十月雁背高三更河流去物生各擾擾念此煎百慮聊將憂世心數遍橋西樹

旋買青芒鞋去踏沙頭月爭教冠蓋地著此影突兀樹寒栖鳥動風靜孤管發月色夜夜佳人生事如髮夢中續清游濃露濕銀闕

晚步

手把古人書閒讀下廣庭荒村無車馬日落雙檣青曠

然神慮靜濁俗非所寧逍遙出荆扉竚立瞻郊垌須臾
暮色至野水皆晶熒却步面空林遠意更杳冥停雲甚
可愛重疊如沙汀

同楊運幹黃秀才村西買山藥

潦縮田路寬委蛇散腰脚勝日三枝杖西村買山藥岡
巒相吞吐遠水互前却天陰野水明歲暮竹籬薄田翁
領客意發筐堆磊落玉質緗色裘用世乃見縛屠門幾
許快夜語尋幽約石鼎看雲翻門前北風惡

招張仲宗

北風日日吹茅屋
幽子朝朝只地爐
客裏賴詩增意氣
老來唯懶是工夫
空庭喬木無時事
殘雪疎籬當畫圖
亦有張侯能共此
焚香相待莫徐驅

寓居劉倉解中晚步過鄭倉臺上

紗巾竹杖過荒陂
滿面春風二月時
世事紛紛人易老
春陰漠漠絮飛遲
士衡去國三間屋
子美登臺七字詩
草遼天西青不盡
故園歸計入支頤

八閩僧房遇雨

脫履坐明窓偶至情更適池上風忽來斜雨滿高壁深
松含歲暮幽鳥立晝寂世故方未闌焚香破今夕

贈黃家阿華

君家阿華如白玉呼出燈前語陸續可憐郎罷窮一生
只今有汝照茅屋猪生十子豚復豚阿華明年可當門
家庭一笑不外索萬事紛紛何足論

發商水道中

商水西門語東風動柳枝年華入危涕世事本前期草
草檀公策茫茫杜老詩山川馬前濶不敢計歸時

西軒寓居

牢落西軒客巡簷費獨吟桃花明薄暮燕子鬧微陰辛苦元吾事淹留更此心小宦隨意寫蛇蚓起相尋

鄧州西軒書事十首

小儒避賊南征日皇帝行天第一春走到鄧州無脚力
桃花初動雨留人

千里空攜一影來白頭更著亂蟬催
書生身世今如此

倚遍周家十二槐

瓦屋三間寬有餘可憐小陸不同居易求蘇子六國印
難得河橋一字書

莫嫌啖蔗佳景遠
橄欖甜苦亦相并
都將壯節共辛苦
準擬殘年看太平

皇家卜年過周歷
變故未必非天仁
東南鬼火成何事
終待邊烽作爭臣

楊劉相傾建中亂不待白首今同歸只今將相須廉寵
五月并門未解圍

不須夜夜看太白天地景氣今如斯始行螭蚌相攻策
可惜中原見事遲

詔書憂民十六事父老祝君一萬年白髮書生喜無寐
從今不仕可歸田

范公深憂天下日仁祖愛民全盛年遺廟只今香火冷
時時風葉一騷然

諸葛經行有夕風千秋天地幾英雄弔古不須多感慨
人生半夢半醒中

晚步順陽門外

六尺枯藜了此生順陽門外看新晴樹連翠篠園春晝
水泛青天入古城夢裏偶來那計日人間多事更聞兵
只應十載溪橋路欠我婆姍勃窣行

縱步至董氏園亭二首

槐葉層層新綠生客懷依舊不能平自移一榻西窗下

要近叢篁聽雨聲

客子今年馳褐寬鄧州三月始春寒簾鈎桂盡蒲團穩
十丈虛庭借雨看

題簡齋

我窻三尺餘可以閱晦明北省雖巨麗無此風竹聲不
著散花女而况使鬼兄世間多歧路居士繩床平未知
阮遙集幾屐了平生領軍一屋鞋千載笑絕縷槐陰自
入戶知我喜新晴覓句方未了簡齋真虛名

春雨

花盡春猶冷羈心只自驚孤鶯啼永晝細雨濕高城
擾成何事悠悠送此生蛛絲閃夕霽隨處有詩情

登城樓

去年夢陳留今年夢鄧州幾夢即了我一笑城西樓新
晴草木麗落日淡欲收遠川如動搖景氣明田疇百年
幾憑欄亦有似我否城陰坐來失白水光不流丈夫貴
快意少住寬千憂歸嫌簡齋陋局促生白頭

雨

忽忽忘年老悠悠負日長小詩妨學道微雨好燒香簷鵲移時立庭梧滿意涼此身南復北彷彿是他鄉

夏夜

閒弄玉如意天河白練橫時無李供奉誰識謝宣城兩鵠翻明月孤松立快晴南陽半年客復此滿懷清

鄧州城樓

鄧州城樓高百尺楚岫秦雲不相隔傍城積水晚更明

照見綸巾倚樓客李白上天不可呼陰晴變化還須臾
獨撫危欄詠奇句滿樓風月不枝梧

秋日客思

南北東西俱我鄉聊從地主借胡床諸公共得何侯力
遠客新抄陸氏方老去事多藜杖在夜來秋到葉聲長
蓬萊可託無因至試覓人間千仞岡

道中書事

臨老傷行役籃輦歲月奔客愁無處避世事不堪論白

道含秋色青山帶雨痕壞梁斜鬪水喬木密藏村易破
還家夢誰招去國魂一身從白首隨意答乾坤

美哉亭

西出城臯關土谷僅容駆天掛一足練雙崖鬪峩峨忽
然五大闕亭構如危巢青山麗中原白日照大河下視
萬里川草木何其多臨高一吐氣却奈雄風何辛苦生
一快造化巧揣摩險易終不償翻身下殘坡

與季申信道自光化復入鄧書事四首

孫子白木杖富子黑油笠我獨白竹籃差池復相及夕
陽橋邊盡岸幘歸雲急勿語城中人從渠慎出入

賣舟作歸計竹輿穩如舟霧收青臯濕行路當春遊老
馬不自知意欲踏九州依然還故櫨寂寞壯心休

再來生白髮重見鄧州春依舊城西路桃花不記人卜
居得窮巷日色滿窗新微吟驚市卒獨鶴語城闈

城西望城南十日九相隔如何三枝杖共踏上石門
前流水過春意滿渠碧遙知千頃江如今好顏色

寄季申

雨歇城南泥未乾遙知獨立整衣冠昔時業下劉公幹
今日遼東管幼安綠陰展盡身猶遠黃鳥飛來節已闌
安得一尊生耳熱暫時相對說悲歡

重陽

去歲重陽已百憂今年依舊歎羈遊籬底菊花唯解笑
鏡中頭髮不禁秋涼風又落宮南木老鴈孤鳴漢北州
如許行年那可記謾排詩句寫新愁

有感再賦

憶得甲辰重九日天恩曾預宴城東龍沙此日西風冷
誰折黃花壽兩宮

感事

喪亂那堪說干戈竟未休公卿危北顧江漢故東流風
斷黃龍府雲移白鷺洲云何舒國步持底副君憂世事
非難料吾生本自浮菊花紛四野作意為誰秋

送客出城西

鄧州誰亦解丹青畫我羸驂曉出城殘年政爾供愁了
末路那堪送客行寒日滿川分衆色暮林無葉寄秋聲
垂鞭歸去重回首意落西南計未成

得席大光書因以詩迓之

十月風高客子悲故人書到暫開眉也知廊廟當推轂
無奈江山好賦詩萬事莫論兵動後一杯當及菊殘時
喜心翻到相迎處不怕荒林十里坡

無題

六經在天如日月萬事隨時更故新江南丞相浮雲壞
洛下先生寧木春孟嘉何妨改師法京房底處有門人
舊喜讀書今懶讀焚香閱世了閒身

正月十二日自房州城遇金兵至奔入南山十五
日抵回谷張家

久謂事當爾豈意身及之避兵連三年行半天四維我
非洛豪士不畏窮谷飢但恨平生意輕了少陵詩今年
奔房州鐵馬背後馳造物亦惡劇脫命真毫釐南山四

程雲布襪傲險巇
離間老矣背無憲
管安危知我是朝士
亦復顰其眉呼酒軟客脚
菜本濯玉肌窮途士易德
歡喜不復辭向來貪讀書
閉戶生白髭豈知九州內有
此奇自寬實不情老人亦解頤
投宿恍世外青燈
茅茨夜半不能眠澗水鳴聲悲

宋詩鈔卷四十二

總校官庶吉士臣張能照
校對官庶吉士臣陳墉

謄錄監生臣童浴曾

欽定四庫全書叢書要

集部

宋詩鈔卷四十三

詳校官候選知縣臣吳國華



欽定四庫全書
宋詩鈔卷二萬二百九十六

集部

宋詩鈔卷四十三

內閣中書舍人吳之振編

陳與義簡齋集鈔下

十七夜詠月

月輪隱東峰奇彩在南嶺北崖草木多蒼茫映光景玉盤忽微露銀浪瀉千頃岩谷散陸離萬象雜形影不辭三更露冒此白髮頂老筇無前遊危處有新警澗光如

翻鶴變態發遙境回首房州城山中夜何永

與信道遊澗邊

斜陽照亂石顛崖下雙筇試從絕壑底仰視最奇峰迴
磴發澗怒高靄生樹容半岩菖蒲根翠葆森伏龍豈無
避世士於此儻相逢客心忽悄愴歸路迷行踪

遊南嶂同孫信道

遙瞻南嶂深復深雙崖與天藏太陰青鞋濟勝不能嬾
踏破積雪窮崎嶇空中朽樹抱孤條無寂蒼壁生橫林

孤禽三叫危石裂欲返未返神蕭森磴迴忽然何處所
當面煙如翠蛟舞石門泄風無晝夜古木截道藏雷雨
丹丘赤城去幾許下視人間足塵土放身天地不自知
導以龍蛇翼熊虎山中異事記今晨杖藜得道孫與陳

同信道晚登古原

幽懷忽牢落起望登古原微吹度脩竹半林白翻翻日
暮紛物態山空銷客魂惜無一尊酒與子醉中言

岸幘

岸幘立清曉山頭生薄陰亂雲交翠壁細雨濕青林時
改客心動鳥鳴春意深窮鄉百不理時得一閒吟

雨

雲起谷全曙雨晴山復明青春望中色白澗晚來聲遠
樹鳥羣集高原人獨耕老夫逃世久堅坐聽陰晴

出山二首

陰岩不知晴路轉見朝日獨行脩竹盡石崖千丈碧
山空樵斧響隔嶺有人家日落潭照樹川明風動花

入山二首

出山復入山路隨溪水轉東風不惜花一暮都開遍
都迷去時路策杖煙漫漫微雨洗春色諸峰生晚寒

寒食

竹籬寒食節微雨澹春意誼諱少所便寂寞今有味空
山花動搖亂石水經緯倚杖忽已晚人生本何冀

清明

雨晴閒步澗邊沙行入荒林聞亂鶴寒食清明驚客意

暖風遲日醉梨花
書生投老王官谷
壯士偷生漂母家
不用鞦韆與蹴踘
只將詩句答年華

出山道中

雨歇澹春曉
雲氣山腰流
高崖落絳葉
恍如人世秋
避地時忽忽
出山意悠悠
溪急竹影動
谷虛禽響幽
同行得快士
勝處頻淹留
乘除了身世
未恨落房州

詠青溪石壁

青溪宜曉日
曲處千丈晦
天開蒼石屏
影落西村外
虛

無元氣立明滅河漢對人行崢嶸下鳥急浩蕩內向來
千萬峰瑣細等蓬塊老夫倚杖久三歎造化大惜哉太
史公意短遺此快更欲訪野人窮探視其背

和王東鄉絕句四首

少時走馬洛陽城今作江邊鉗錫僧說與虎頭須畫我
三更月裏影峻嶒

來日安榴花尚稀壓牆丹實已垂垂何時著我扁舟尾

滿袖西風信所之

只今當代功名手不數平生粥飯僧獨立江風吹短髮
暮雲千里倚峻嶒

平生不得吟詩力空使秋霜入鬢垂太岳峰前滿樽月
為君聊復一中之

觀江濤

漲江臨眺足消憂倚杖江邊地欲浮疊浪併翻孤日去
兩津橫卷半天流龜鼈雜怒爭新穴鷗鷺驚飛失故洲
可為一官妨快意眼中唯覺欠扁舟

同左通老用陶潛還舊居韻

故園非無路今已不念歸秋入漢水白葉脫行人悲東
西與南北欲往還覺非勿云去年事兵火偶脫遺可憐
嶺屏影殘歲聊相依天涯一尊酒細酌君勿催持觴望
江湖路永悲身哀百感醉中起清淚對君揮

同通老用淵明獨酌韻

紛紛吏民散遺我以兀然悄悄今夕意鳥影馳隙間向
來房州谷採藥危得仙忽駕太守車出處寧非天何妨

暫閱世謀行要當先西齋一壺酒微雨新秋還蝶網門
明晦葉聲餒歲年呼兒具紙筆錄我醉中言

欲離均陽而雨不止書八句寄何子應

江城八月楓葉飄城頭哦詩江動搖秋雨留人意
水光泛樹風蕭蕭綸巾老子無遠策長作東西南北客
不知何遜在揚州坐待梅花映妝額

均陽舟中夜賦

遊子不能寐船頭語輕波開窗望兩津煙樹何其多晴

江涵萬象夜半光蕩摩客愁彌世路秋氣入天河汝洛
塵未銷幾人不負戈長吟宇宙內激烈悲蹉跎

舟次高舍書事

漲水東流滿眼黃泊舟高舍更情傷一川木葉明秋序
兩岸人家共夕陽亂後江山還歷歷世間岐路極茫茫
遙指長沙非謫去古今出處兩淒涼

登岳陽樓二首

洞庭之東江水西簾旌不動夕陽遲登臨吳蜀橫分地

徙倚湖山欲暮時
萬里來遊還望遠
三年多難更凭危
白頭弔古霜風裏
老木蒼波無限悲

天入平湖晴不風
夕帆和雁正浮空
樓頭客子杪秋後
日落君山元氣中
北看可堪回白首
南遊聊得看丹楓
翰林物色分留少
詩到巴陵還未工

巴丘書事

三分書裏識巴丘
臨老避居初一遊
晚水聲酣洞庭野
晴天影抱岳陽樓
四年風露侵遊子
十月江湖吐亂洲

未必上流須魯肅腐儒空白九分頭

晚步湖邊

客間無勝日世故可暫逃杖藜迎落照寒影徧平皋夕
湖光景麗晴鶴聲音豪天長蒹葭響水落城堞高萬象
各搖動慰此老不遭楚壘經行地處處餘離騷幸無大
夫貴得伴諸子遨終然動懷抱白髮風中搔

再登岳陽樓感賦詩

岳陽壯觀天下傳樓陰背日堤綿綿草木相連南服內

江湖異態闌干前乾坤萬事集雙鬢臣子一謫今五年
欲題文字弔古昔風壯浪湧心茫然

有感

遭亂始知承平樂謫居更覺皇都好巴陵十月江不平
萬里北風吹客倒洞庭葉稀秋聲歇黃帝樂罷川果果
君山偃蹇橫歲暮天映湖南白如埽人世多違壯士悲
干戈未定書生老揚州雲氣鬱不動白首頻回費私禱
后勝誤齊已莫追范蠡圖越當若為皇天豈無悔過意

君子慎惜經綸時願聞羣公張王室臣也安眠送餘日

除夜

城中爆竹已殘更朔吹翻江意未平多事鬚毛隨節換
盡情燈火向人明比量舊歲聊堪喜流轉殊方又可驚
明日岳陽樓上去島煙湖霧看春生

曉登燕公樓

闌干納清曉拄杖追黃鵠燕公不相待使我立於獨霧
收天落川日動春浮木舉手謝時人微風吹野服

詠水仙花五韻

仙人絹色裘縞衣以褐之青悅紛委地獨立東風時吹
香洞庭暖弄影清晝遲寂寂籬落陰亭亭與予期誰知
園中客能賦會真詩

望燕公樓下李花

燕公樓下繁華樹一日遙看一百迴羽蓋夢餘當晝立
縞衣風急過牆來洛陽路不容春到南國花應為客開
今日豈堪簪短髮感時傷舊意難裁

陪粹翁舉酒於君子亭下海棠方開

世故驅人殊未央聊從地主借繩床春風浩浩吹遊子
暮雨霏霏濕海棠去國衣冠無態度隔簾花葉有輝光
使君禮數能寬否酒味撩人我欲狂

春夜感懷寄席大光

管寧白帽且蹁躚孤鶴歸期難計年倚杖東南觀百變
傷心雲霧隔三川江湖氣動春還冷鴻雁聲迴人不眠
苦意西川老太守何時相伴一燈前

夜賦寄友

賣藥韓康伯談經營幼安向來甘寂寞不是為艱難明月扶疎樹空園浩蕩寒細題今夕景持與故人看

陰風

陰風三日吹南極二月巴陵寒裂石長林巨木受軒輊洞庭倒流瀟湘黑君不見古盧竹扉聲策策中有嶺嶧落南客曾經破膽向炎官敢不修容待風伯

雨

霏霏三日雨靄靄一園青霧澤含元氣風花過洞庭地
偏寒浩蕩春半客嶺畔多少人間事天涯醉又醒

春寒

二月巴陵日日風春寒未了怯園公海棠不惜臙脂色
獨立濛濛細雨中

次韻傅子文絕句

風雨門前十日泥荒階相伴只筇杖從今老子都無事
落盡園花不賦詩

城上晚思

獨凭危堞望蒼梧落日君山如畫圖無數柳花飛滿岸
晚風吹過洞庭湖

雨中對酒庭下海棠經雨不謝

巴陵二月客添衣草草杯觴恨醉遲燕子不禁連夜雨
海棠猶待老夫詩天翻地覆傷春色齒豁頭童祝聖時
白竹籬前湖海闊茫茫身世兩堪悲

尋詩兩絕句

楚酒困人三日醉園花經雨百般紅無人畫出陳居士

亭角尋詩滿袖風

愛把山瓢莫笑儂愁時引睡有奇功醒來推戶尋詩去
喬木崢嶸明月中

寒食日遊百花亭

晴氣已復濁虛館可淹留微花耿寒食始覺在他州自
聞鼙鼓聒不恨歲月流亂代有今夕茲園况堪遊雲移
樹陰失風定川華收曳杖新城下日暮禽語幽羣行意

易分獨賞興難周
永嘯以自暢
片月生城頭

周尹潛以僕有郢州之命作詩見贈有橫槊之句

次韻謝之

一歲憂兵四閱時
偷生不恨隙駒馳
如何南紀持竿手
却把西州破賊旗
儻有青油盛快士
何妨畫戟入新詩
因君調我還增氣
男子平生竟要奇

次韻尹潛感懷

兵戈又看繞淮春
歎息猶為國有人
可使翠華周寓縣

誰持白羽靜風塵
五年天地無窮事
萬里江湖見在身
共說金陵龍虎氣
放臣迷路感煙津

泊宋田遇厲風作

逐隊避狂寇
湖中可盤嬉
泊舟宋田港
俯仰看雲移
造物猶不惜
顛風忽橫吹
洞庭何其大
浪挾雲車馳
可憐岸上竹
翻倒不自持
老夫元耐事
淹速本無期
會有大風定
見汝亭亭時
五月念貂裘
竟生薄暮悲
蕭蕭不自暢
耿耿獨題詩

卷四十三
贈傅子文

漁子牧兒談笑新先生勝日步湖濱沙邊忽見長身士
頭上仍欹折角巾豺虎不能寬遠俗山川終要識詩人
蘆叢如畫斜陽裏拄杖相尋無雜賓

晚晴野望

洞庭微雨後涼氣入綸巾水底歸雲亂蘆叢返照新遙
汀橫薄暮獨鳥度長津兵甲無歸日江湖送老身悠悠
只倚杖悄悄自傷神天意蒼茫裏村醪亦醉人

舟抵華容縣

篙舟入華容白水繞城堞夾津列茂樹倒影青相接遠
色分村塢微涼動蘆葉天地困腐儒江湖託孤檝

夜賦

泊舟華容縣湖水終夜明淒然不能寐左右菰蒲聲窮
途事多違勝處亦心驚三更螢火鬧萬里天河橫阿瞞
狼狽地山澤空崕嶧強弱與興衰今古莽難平腐儒憂
平世况復值甲兵終然無寸策白髮滿頭生

晚晴

卷四十三

幽卧不知晴檣梢見斜日披衣起四望天際山爭出光輝渚蒲淨意氣沙鷗逸避盜半九圍雨脚不遺力川陵各異態艱險常一律胡為作弧矢前聖意莫詰豈知百代後反使奸宄密腐儒徒嘆嗟救弊知無術人生如歸雲空行雜徐疾薄暮俱到山谷不見踪跡念此百年內可復受憂戚林木方翳然放懷陶茲夕

九月八日登高作重九寄父賦三十韻與義拾餘

意亦賦十二韻

九日風景好節意滿天涯書生尊所聞登高亂城鴉雖
無後乘麗前驅載黃花兩樓壓波壯衆澤分天斜居今
驚有苗訪古悲章華蕭條湖海事勝日一笑譁興移三
里亭水影雜蛟蛇二士醉藜杖兩禪風衆裘裘奇哉古無
有未覺欠孟嘉天公亦喜我催詩出微霞賦罷迹已陳
憂樂如轉車却後五百歲遠俗增雄誇

粹翁用奇父韻賦九日與義同賦兼呈奇父

安穩輕節序艱難惜歡娛先生守首蓿朝士誇茱萸前
年鄧州城風雨傾客居何嘗疎麴生麴生自我疎豈無
登高地送目與雲俱門生及兒子勸我升籃輦出門復
入門戈旆填街衢去年郢州岸孤櫟對壞郢莫招大夫
魂誰攬使君鬚獨題懷古句枯硯生明珠亦復躋荒戍
日暮野踟蹰白衣終不至渺渺空愁予今年洞庭上九
折餘崎嶇時憑岳陽樓山川看繁縝孫兄語蟬連王丈
色敷腴不用踏筵舞秋風搖菊株樂哉未曾有是夢其

非歎丈夫各堂堂坐受世故驅會須明年節醉倒還相
扶此花期復對勿令墮空虛明日風景佳南翔先一鳬
何言知幾早政爾因鱸魚分襟肺肝熱撫事歲月迂歸
家問餅錫生理何必餘相期衡山南追步凌忽區回首
望堯雲中原莽榛蕪臣豈專愛死有懷竟不舒老謀與
壯事二者慙俱無

送王因叔赴試

楓落南紀明秋高洞庭白自是天涯人更送湖上客人

生險易乘除裏富貴功名從此起不須惜別作潛然滿
路新詩付吾子

別岳州

朝食三斗葱暮飲三斗醋寧受此酸辛莫行歲晚路大
夫少壯日忍窮不自恕乘除冀晚泰乃復逢變故經年
岳陽樓不見南宮樹辭巢已萬里兩脚未遑住水落君
山高洞庭秋已素浮雲易歸岫遠客難回顧飄然一併
錫未知所掛處寂寞短歌行蕭條遠游賦學道始恨晚

為儒孰非腐乾坤杳茫茫三歎出門去

初識茶花

伊軋藍輿不受催湖南秋色更佳哉青裙玉面初相識
九月茶花滿路開

別伯共

尊酒相逢地江楓欲盡時猶能十日客共出數年詩供
世無筋力驚心有別離好為南極柱深慰旅人悲

再別

多難還分手江邊白髮新公為九州督我是半途人政
爾傾全節終然却要身平生第溫嶠未必下張巡

別孫信道

萬里鷗仍去千年鶴未歸極知身有幾不柰世相違歲
暮蒹葭響天長鴻雁微如君那可別老淚欲沾衣

江行野宿寄大光

檣烏送我入蠻鄉天地無情白髮長萬里回頭看北斗
三更不睡聽鳴榔平生正出元子下此去還經思曠傍

投老相逢難。哀哀共沃詩律。撼瀟湘。

寄信道

衡山未見意如飛。浩蕩風帆不可期。
却憶府中三語掾。空吟江上四愁詩。
高灘落日光零亂。遠岸叢梅雪陸離。
勝欲平分持寄子。白頭才盡只成悲。

衡獄道中四首

野客元耕嵩嶽田。得遊衡獄是前緣。
避兵徑度吾豈忍。欲雨還休神所憐。
世亂不妨松偃蹇。村空更覺水潺湲。

非無拄杖終傷老負此名山四十年

客子山行不覺風龍吟虎嘯滿山松綸巾一幅無人識

勝業門前聽午鐘

城中望衡嶽浮雲作飛蓋竭來岩谷遊却在浮雲外

危亭見上方林壑帶殘陽今日豈無恨重遊却昧長

除夜次大光韻大光是夕婚

一杯節酒莫留殘坐看新年上鬢端只恐梅花明日老

夜瓶相對不知寒

除夜不寐飲酒一盃明日示大光

萬里鄉山路不通年年佳節百憂中催成客睡須春酒
老却梅花是曉風

元日

五年元日只流離楚俗今年事事非後飲屠蘇驚已老
長乘舴艋竟安歸攜家作客真無策學道割心却自違
汀草岸花知節序一身千恨獨沾衣

別大光

堂堂一年長渺渺三秋澗恍然衡山前相遇各白髮峩
窮窻欲竅人老情難竭君有杯中物我有肝肺熱飲盡
不能起交深忘事拙乾坤日多虞遊子屢驚骨衡陽非
不遙雁意猶超忽一生能幾回百計易相奪渴澑江漫
風耿耿客孤發他夕懷君子岩間望明月

道中

雨子收還急溪流直又斜迢迢傍山路漠漠滿林花破
水雙鷗影掀泥百草芽川原有高下隨處著人家

將至杉木舖望野人居

春風漠漠野人居若使能詩我不如數株蒼檜遮官道

一樹桃花映草廬

曉發杉木

古澤春光淡高林露氣清紛紛世上事寂寂水邊行客
子凋雙鬢田家自一生有詩還忘記無酒却思傾

先寄邢子友

作客經年樂有餘邵陽岐路不崎嶇山川好處欹紗帽

桃李香中度筍輿欲見舊交驚歲月剩排幽語說艱虞
人間書疏非吾事一首新詩未可無

立春日雨

衡陽縣下春日雨遠映青山絲樣斜容易江邊欺客袂
分明沙際濕年華竹林路隔生新水古渡船空集亂鴉
未暇獨憂巾一角西溪當有續開花

初至邵陽逢入桂林使作書問其地之安危

湖北彌年所長沙費月餘初為邵陽夢又作桂林書老

矣身安用飄然計本疎管寧遼海上何得更端居

過孔雀灘贈周靜之

海內無堅壘天涯有近親不辭供笑語未慣得殷勤舟楫深宜客溪山各放春高眠過灘浪已寄百年身

江行晚興

曾聽石樓水今過邵州灘一笑供舟子五年行路難雲間落日淡山下東風寒煙嶺叢花照夕灣羣鶩盤生身後聖哲隨俗了悲歡淹旅非吾病悠悠良足歎

夜抵貞牟

野暝猶聞遠川明不恨遲焚山隔岸火及我繫船時夜半青燈屋籬前白水陂殷勤謝地主小築欲深期

雨

雲物澹清曉無風溪自閒柴門對急雨壯觀滿空山春發蒼茫內鳥鳴篁竹間兒童笑老子衣濕不知還

今夕

今夕定何夕對此山蒼然偷生經五載幽意獨已堅微

陰拱衆木靜夜聞孤泉唯應寂寞事可以送餘年

暝色

殘暉度平野列岫圍青春柴門一枝筇日暮棲心神暝色著川嶺高低鬱輪囷水光忽到樹山勢欲傍人萬化元相尋幽子意自新肅肅夜將久空明動邊垠田鶴吟相應我獨無荒鄰短篇不可就所寄聊一伸

貞年書事

留侯辟穀年漢鼎無餘功子真策不售脫迹市門中神

仙非異人由來本英雄撫世獨餘事用舍何必同眷茲
貞牟野息駕吾其終蒼山雨中高綠草溪上豐仲春水
木麗禽鳴清晝風禍福兩合繩既解一身空榮華信非
貴寂寞亦非窮

山中

當復入州寬作期人間踏地有安危風流丘壑真吾事
籌策廟堂非所知白水春陂天澹澹蒼峰晴雪錦離離
恰逢居士身輕日正是山中多景時

謝主人

春禽勸我歸
主人留我住
一笑謝主人
我自無歸處
擬借溪邊三畝春
結茅依樹不依鄰
伐薪正可煩名士
分米何須待故人

羅江二絕

荒村終日水車鳴
陂北陂南共一聲
灑面風吹作飛雨
老夫詩到此間成

山翁見客亦欣然
好語重重意不傳
行過竹籬逢細雨

眼明雙又鷺立青田

三月二十日聞德音寄李德升席大光新有召命

皆寓永州

塵隔牛牛三月餘德音再與萬方初又蒙天地寬今歲
且掃軒窗讀我書自古安危關政事隨時憂喜到樵漁
零陵併起扶頭手九廟無歸計莫疎

題東家壁

斜陽步屢過東家便置清尊不貲茶高柳光陰初罷絮

嫩鳬毛羽欲成花羣公天上分時棟閒客江邊管物華
醉裏吟詩空跌宕借君素壁落栖鴉

曳杖

柳條一何長我髮一何短餘日會有幾經春卧荒墳曳
杖陂西去悠然寄蕭散田壠粲高低白水一時滿農夫
暮猶作媿我讀書嬾且復棄今茲前峰青蹇幢

開壁置窓命曰遠軒

鍾妖鳴吾旁楊獠舞吾側東西俱有礙羣盜何時息丈

夫堂堂軀坐受世禍迫仙人千仞岡下視笑予厄誰能
久鬱鬱持斧破南壁窓開三尺明空納萬里碧岩霏雜
川靄奇變供几席誰見老書生軒中岸玄幘蕩漾浮世
裏超遙送茲夕倚楹發孤嘯呼月出荒澤天公亦粲然
林壑受珠璧會有鶴賀賓經過來見客

再賦

清曉望南軒望山頭屢側居士亦豈痴飛雲方未息樂
哉此遠俗亂世免怵迫那知百戰禍豈識三空厄閉門

美熟睡開門瞻翠壁遠客謝主人分此一窓碧新晴鳥
鳴簷微暑風入席蕭然此白首豈更冒朝幘誓將老茲
地不復數晨夕但恨食無肉臞仙出山澤蟄雷轉空腸
吐句作圭璧一笑示鄰家向來無此客

又賦

我昨在衡山傷心衢路側豈知得此地一坐數千息易
安生痛定遇美出飢迫誓言如齊侯常戒在莒厄要將
萬里身獨面九年壁如何不已奈開窗翫霏碧招呼面

前山浮翠落衾席一笑等兒戲都忘雪侵幘人生何不
娛今夕定何夕向來萬頃曾餘地吞七澤念此亦細事
未遠瑕生璧聊使山中人永記山下客

傷春

廟堂無策可平戎坐使甘泉照夕烽初怪上都聞戰馬
豈知窮海看飛龍孤臣霜髮三千丈每歲烟花一萬重
稍喜長沙向延閣疲兵敢犯虎狼鋒

題水西周十三壁二首

不管先生巾欲摧雨中艇子便撐開青山隔岸迎人去
白鷺衝烟送酒來

周子芻中早得春喚人同度一溪雲貪看雨歇前峰變
不覺斟時已十分

山齋

雖媿荷鋤叟朝來亦不閒自剪牆角樹盡納溪西山經
行天下半送老此窓間日暮煙生嶺離離飛鳥還

散髮

百年如寄亦何為
散髮清狂未足非
南澗題詩風滿面
東橋行藥露霑衣
松花照夏山無暑
桂樹留人我豈歸
藜杖不當軒蓋用
穩扶居士莫相違

觀雨

山谷龍鍾不解耕
開軒危坐看陰晴
前江後嶺通雲氣
萬壑千林送雨聲
海壓竹枝低復舉
風吹山角晦還明
不嫌屋漏無乾處
正要羣龍洗甲兵

寄大光二絕句

心折零陵霜入鬢更修短札問何如江湖不是無來雁

只憒平生作報書

芭蕉急雨三更鬧客子殊方五月寒近得會稽消息否
稍傳荆渚路岐寬

村景

黃昏吹角聞呼鬼清曉持竿看牧鴉蠶上樓時桑葉少
水鳴車處稻苗多

寄德升大光

君王憂詔起羣公也置樵夫尺一中易著青衫隨世事
難將白髮犯秋風共談太極非無意能繫蒼生本不同
却倚紫陽千丈嶺遙瞻黃鵠九霄東

次韻邢九思

百年鼎鼎雜悲歡老去初依六祖壇玄晏不堪長抱病
子真那復更為官山林未必容身得顏面何宜與世看
白帝高尋最奇事共君盟了不應寒

遙碧軒作呈使君少隱時欲赴召

我本山中人尺一喚起趨埃塵君為邊城守作意邀山
入窓牖朝來爽氣如有期送我憑軒一杯酒大夫已忍
猿鶴羞欲去且復斯須留西峰木脫亂鬟擁東嶺煙破
脩眉浮主人愛客山更好醉裏一笑驚蠻州丁寧雲雨
莫作厄明日青山當逐客

石限病起

幽人病起山深處小院鴉鳴日午時六尺屏風遮晏坐
一簾細雨獨題詩

愚溪

小閣當喬木清溪抱竹林寒聲日暮起客思雨中深行
李妨幽事欄干試獨臨終然遊子意非復昔人心

己酉中秋之夕與任才仲醉於岳陽樓上明年十

一月二十日南遊過道謁姜光彥出才仲畫軸
則寫是夕事也剪燭觀之恍然一笑書八句以

當畫記

去年中秋洞庭野寒瑤萬頃兼天瀉岳陽樓上兩幅巾

月入欄干影瀟灑世間此影誰能孤狂如我友人所無
一夢經年無續處道州還見倚樓圖

度嶺

年律將窮天地溫兩州風氣此橫分已吟子美湖南句
更擬東坡嶺外文隔水叢梅疑是雪近人孤嶂欲生雲
不愁去路三千里少住林間看夕曛

次韻謝呂居仁居仁時寓賀州

別君不覺歲時荒豈意相逢魑魅鄉籩裏詩書總寥落

天涯形貌各昂藏江南今歲無征戰嶺表窮冬有雪霜
黨可卜鄰吾欲住草茅為蓋竹為梁

舟行遣興

會稽尚隔三千里臨賀初盤一百灘殊俗問津言語異
長年為客路岐難背人山嶺重重去照鷗梅花樹樹殘
酌酒柂樓今日意題詩船壁後來看

康州小舫與耿伯順李德升席大光鄭德象夜話
以更長愛燭紅為韻得更字

萬里衣冠京國舊一船風雨晉康城燈前顏面重相識
海內艱難各飽更天澗路長吾欲老夜闌酒盡意難傾
明朝古峽蒼烟道都送新愁入櫓聲

與大光同登封州小閣

去程欲數莽難知三日封州更作遲青嶂足稽天下士
錦囊今有嶠南詩共登小閣春風裏回望中原夕靄時
萬本梅花為我壽一杯相屬未全癡

登海山樓

萬航如鳧鷺一水如虛空此地接元氣壓以樓觀雄我
來自中州登臨眩冲融白波動南極蒼鬚承東風人間
路浩浩海上春濛濛遠遊為兩眸豈惜勞我躬仙人欲
吾語薄暮山葱蘢海清無蜃氣彼固蓬萊宮

雨中再賦海山樓詩

百尺闌干橫海立一生襟抱與山開岸邊天影隨潮入
樓上春容帶雨來慷慨賦詩還自恨徘徊舒笑却生哀
滅羌猛士今安在非復當年單父臺

題長樂亭

遠山雲迷顛近山淨如沐客子曳竹輿伊亞過山麓我行一何遲時序一何速東風所經過林水一時綠疎雨忽飛墜聲在道邊木淑氣自遠歸光景變川陸遙知存存子明亦戒征軸霽色雖宜詩不見此清穆

題長岡亭呈德升大光

久客不忘歸如頭垢思沐身行江海濱夢繞嵩山麓馬何預得失鵬何了淹速匣中三尺水瘴雨生新綠胡為

古驛中坐聽風吟木既非還吳張亦異赴洛陸兩公茂
名實自是宜鼎軸發發不可遲帝言頻郁穆

贈漳州守蔡叔厚

過盡蠻荒興復新漳州畫戟擁詩人十年去國九行旅
萬里逢公一欠伸王粲登樓還感慨紀瞻赴召欲逡巡
繩床相對有今日勝醉齋中軟脚春

宿資聖院閣

暮投山崦寺高處絕人羣遠岫林間見微泉舍後聞閣

虛雲亂入江闊野橫分欲與僧為記今年懶作文

自黃岩縣舟行入台州

宴坐峰前衝急雨黃岩縣裏借舟遲百年痴點不相補
萬事悲歡豈可期莽莽蒼波兼宿霧紛紛白鷺落山坡
只應江海淒涼地欠我臨風一賦詩

遇下杯渡

夜宿下杯館朝鳴一棹東湖平天盡落峽斷海橫通冉
冉雲隨舸茫茫鳥遡風仙人蓬島上遙見我乘空

泛舟入前倉

曾鼓鹽田棹前倉不足言盡行江左路初過浙東村春去花無迹潮歸岸有痕百年都幾日聊復信乾坤

送熊博士赴瑞安令

衣冠衰衰相逢處草木蕭蕭未變時聚散同驚一枕夢悲歡各誦十年詩山林有約吾當去天地無情子亦飢笑領銅章非失計歲寒心事欲深期

病中夜賦

抱病喜清夜形羸心獨閒不知藥鼎沸錯認雨聲來
晚燈燭麗天長鴻雁哀書生惜日月欹枕意茫茫

喜雨

秦望山頭雲昨日鸞鳳舉冥冥萬里風淅淅三更雨小
臣知君憂起坐聽簷語風力有去來龍工離文武燈花
識我意一笑相媚撫泥翻早朝路瀨瀨光欲吐鬱然蒼
龍闕佳氣接南畝千官次第來豫色各眉宇記事以短
篇不工還自許

醉中

醉中今古興哀事詩裏江湖搖落時兩手尚堪杯酒用
寸心唯是鬢毛知稽山擁郭東西去禹穴生雲朝暮奇
萬里南征無賦筆茫茫遠望不勝悲

不見梅花六言

荆楚歲時經盡今年不見梅花想得蒼煙玉立都藏江
上人家

梅花

鐵面蒼尋洛陽客玉顏紅領會稽仙街頭相見如相識
恨滿東風意不傳

雨

聽雨披夜襟衝雨踏晨鼓萬珠落荀興詩中有新語老龍經秋卧歲暮始一舉成功亦何遲光彩變蒼圓遺邊聞井溢可笑遽如許舊山百尺泉不知旱與雨

除夜

疇昔追歡事如今病不能等閒生白髮耐久是青燈海

內春還滿江南硯不冰題詩餞殘歲鐘鼓報晨興

雨中

北客霜侵鬢
南州雨送年
未聞兵草定
徒使歲時遷
古澤生春靄
高空落暮鶯
山川含萬古
鬱鬱在尊前

渡江

江南非不好
楚客自生哀
搖櫓天平渡
迎人樹欲來
雨餘吳岫立
日照海門開
雖異中原險
方隅亦壯哉

夙興

美哉木枕與管席無禁當興戴朝幘巷南巷北聞鍛聲
舍後舍前唯月色事國無功端未去竹輿伊軋猶昨日
不見武陵城裏事繁華夢覺生荆棘成敗由來幾古今
乾坤但可著山澤西湖已無全碧麗雨抹晴妝尚娛客
會當休日一訪之摩挲蒼蘚慰崖石只恐冷泉亭下水
發明白髮增歎息

幽窓

貧士工用短壯夫弱於詩破壁為幽窓我筆還得持高

鳥度遺影風扉語移時迨我休暇日與物聊同嬉古來
賢哲人畎畝策安危一行或大謬半隱良亦癡寄言山
中友即歲以為期

休日馬上

休日不自休騎馬踏荒徑却扇受景風今朝我無病春
雲闊晨耀羣綠澹相映山川與朝市一動自一靜九衢
行萬人誰抱此懷勝不得與之語蕭蕭寄孤詠

題畫

分明樓閣是龍門亦有溪流曲抱村萬里家山無路入
十年心事與誰論

題崇蘭圖二首

雨公得我色敷腴藜杖相將入畫圖我已夢中多識路
秋風舉袂不踟蹰

奕奕天風吹角巾松聲水色一時新山林從此不牢落
照影溪頭共六人

秋夜獨酌

涼秋佳夕天氣廓河漢之涯秋漠漠月出未出林彩變
幽人露坐方獨酌自歌新調酒如空天星下飲觥船中
忽思李白不可見夜半喬木搖西風百年佳月幾今夕憂
樂相尋老來疾瓊瑤滿地我影橫添酒賦詩何可失

九日示大圓洪智

自得休心法悠然不賦詩忽逢重九日無耐菊花枝

劉大資挽詞二首

天柱欹傾日堂堂墮敵圍遂聞王蠋死不見華元歸一

代名超古千年淚染衣當時如有繼猶足變危機

一死公餘事由來彼亦人使知臨難日猶有不欺臣河
洛傾遺憤英雄歎後塵煌煌中興業公合冠麒麟

觀雪

無住菴前境界新瓊樓玉宇總無塵開門倚杖移時立
我是人間富貴人

小閣晨起

紙帳不知曉鶴鳴吾當興開窗面老松相對寒峻嶒幸

無公家債欲懶還不能汲井瓶我面銅盆旋敲冰梳頭
風入檻散髮霜滿膺四瞻郊澤間蒼煙慘朝凝却望塔
顛日光景舒層層乾坤有奇事變化忽相乘客來無可
語語此不見塵今晨胡牀冷愧我無氍氺

小閣晚望

澤國候易變孟冬乃微和解襟凭小閣日暮歸雲多蒼
蒼散草木莽莽雜山河荒野蟲亂鳴長空鳥時過萬象
各無待唯人顧紛羅備物以養已更用干與戈天風吹

我來衣袂生微波幽懷渺無寄蕭瑟起悲歌

答張正字書

送老茅屋低天寒人跡稀一觴尤有味萬事已無機
歲暮塔孤立風生鴉亂飛此時張正字書札到郊扉

小閣

闌干橫歲暮徙倚度陰晴木落太湖近梅開南紀明病
餘仍愛酒身後更須名鶴鶴忽雙起吾詩還欲成

懷天經智老因訪之

今年二月凍初融
睡起苔溪綠向東
客子光陰詩卷裏
杏花消息雨聲中
西菴禪伯還多病
北柵儒先只固窮
忽憶輕舟尋二子
綸巾鶴氅試春風

牡丹

一自邊塵入漢關
十年伊洛路漫漫
青墩溪畔龍鍾客
獨立東風看牡丹

盆池

三尺清池窗外開
茨菰葉底戲魚回
雨聲轉入浙江去

雲影還從震澤來

西軒

平生江海志
歲暮僧廬中
虛齋時獨步
遡此西窓風初
夏氣未變
幽居念方沖
三日無客來
門外生蒿蓬

晨起

寂寂東軒晨起時
朦朧草木暗疎籬
風來衆綠一時動
正是先生睡足時

登閣

今日天氣佳登臨散腰脚南方宜草木九月未黃落秋
郊乃明麗夕雲更蕭索遠遊吾未能歲暮依樓閣

歲華

歲華日已彫飛葉鳴古瓦白頭倚危檻高旻覆平野遙
瞻疎柳林下有清溪瀉三春既繁麗九秋亦瀟灑平生
萬事過所欠茅一把山川鬱日夕有抱無與寫賦詩老
不工開篇詠風雅

得長春兩株植之窓前

鄉邑已無路僧廬今是家聊乘數點雨自種兩叢花誰落失秋序風煙添歲華衰翁病不飲獨立到棲鴟

九月八日戲作兩絕句示妻子

今夕知何夕都如未病時重陽莫草草剩作幾篇詩
小甕今朝熟無勞問酒家重陽明日是何處有黃花

拒霜

拒霜花已吐吾字不淒涼天地雖肅殺草木有芬芳道人宴坐處侍女古時妝濃露濕丹臉西風吹綠裳

微雨中賞月桂獨酌

人間跌宕簡齋老
天下風流月桂花一壺不覺幾漫盡
暮雨霏霏欲濕鴉

心老久許為作畫未果以詩督之

布衲王摩詰禪餘寄筆端試將能事迫
肯作畫工難秋入無聲句山連欲雨寒平生夢想處
奉乞小贊元

再用迹字韻成一首呈判府

風雨一葉過黃花已陳迹人貧交舊疎歲暮日月疾愈

人積胡椒智不到鬼錄那知庾郎菜地瘦飽金玉不如
學服氣清坐了晨夕尚餘煙月債驅使入吟筆晚逢葛
先生憐我出無僕借車得時詣謬窺文字錄談詩不知
疲或作夜半客揮毫寫珠玉治郡蓋餘力不羨江千萬
不慕李八百願傳公句法容我附風翼城東劉子政著
書方滿屋昨示一篇詩三日歎未足仍聞供筆硯家有
樊通德但恐裴公門從此近捨湜

元忠有侍妾嘗謂某口若人有可愛處吾嘗記書中事不審使之尋輒能知其處詩成

嘗記書中事不審使之尋輒能知其處詩成或使之寫亦往往如人意陳學士願聞斯語

蒙示涉汝詩次韻

城南天倒影綠浪搖十里使君雲夢胷猶復錄此水舟
行及雨霽秋色在葭葦烟涵翠縠潤月照金波委知公
已忘機鷗鷺宛停峙向來趨熟士說似頴應泚俗子與
清游自古劇函矢如何有雙脚受垢不受洗異哉公殊
嗜記此兩苦李詩成墮衡門名字汚紙尾公詩賜某及家弟也明
當躡公迹佳處不待指會逢白沙渚我舍真可徙鳴芻
儻重來傍舫傾我耳

遊峴山次韻

夜度一程雲平明踏山址山神豈妬我飛雨亂眸子重
岳袞袞去前傑後俊偉晦明更百態始望那及此路窮
得精盧稅駕咨祖始老僧千金意佳處相指示先生一
笑領得句易翻水安石未歸山却要山料理奇哉此一
段驚世無前軌酬山以快飲春蕨正滋旨一丘儻許予
高卧飽松髓城中謾拄笏那知有茲事

高人買山隱百萬猶恨少客兒最省事有屐一生了東

莊良不遙十里望縹渺紫紜並麥壠翠浪四山繞先生
滯鹿車去程通鳳沼暫來山泉上思與飛雲杳雲北接
雲南一紀絕紛擾竹林懷風雨目斷極窈窕從來無世
塵相對真不撓龍兒爭地出頭角已表表先生囑支郎
勿使斤斧天終當乞一杖險路扶吾老

和孫升之

姬國餘芳代有人于今公子秀溪瀆處心如水尚書市
能賦臨流靜節君花島紅雲春句麗月梅疎影夜香聞

囊開古錦湖山出何意一星窺妙文

此和升之詠周堅仲十二年前到周

子壁間有詩曾見之故有一星窺妙文之句

寺居

招提遠占一牛鳴阻絕干戈得暫經夢境了知非有實
醉鄉不入自常醒樓臺近水涵明鑑草樹連空寫素屏
物象自堪供客眼未須覓句戶長扃

又用韻春雪

急雪催詩興未闌東風肯奈鳥鳥寒最憐度牖勤勤意

更接飛花細細看連夜拋回三白瑞及時驚動五辛盤
袁安久絕千人望春破還思綺一端

次韻邢子友

壯士如今爛莫收尚思抽矢射旄頭不堪苦霧侵衰鬢
稍喜和煙入戍樓萬里中原空費夢三春勝日偶成遊
青松遠嶺偏驚眼薄晚闌干更少留

梅

愛欹纖影上窗紗無限輕香夜遼家一陣東風濕殘雪

強將嬌淚學梨花

蒙知府寵示秋日郡圃佳製遂侍杖屨逍遙林水

間輒次韻四篇上瀆台覽

歲月移文外乾坤杖履中鏗然五字律

一作健

在百夫

雄秋入池深碧寒欺葉遞紅此間兼吏隱端不減遊嵩

客有遊嵩山者歸以語
公以不得遊為恨

鳥語知公樂晴山及我遊盡排物外事拚作酒中浮菊
蕊離雙鬢林聲隱四愁騷人例喜賦政自不關秋

竹際笙簧起回聽衆籟微時陪物外賞肯念日斜歸草色違秋意池光淨客衣吟公清絕句政爾不能肥一笑聊開口千憂不上眉林深受風得柏老到霜知小憩逢筠洞幽尋及枳籬願公勤秉燭裁詠囊離離

送人歸京師

門外子規啼未休山村日落夢悠悠故園便是無兵馬猶有歸時一段愁

賦康平老銅雀硯

鄴城臺殿已荒涼依舊山河滿夕陽瓦礫却鏡今日硯似教人世寫興亡

和顏持約

半篙寒碧秋垂釣一笛西風夜倚樓多少巫山舊家事老來分付水東流

早行

露侵駝褐曉寒輕星斗闌干分外明寂寞小橋和夢過稻田深處草蟲鳴

次韻景純道中寄大成

聞道歌行伏李紳古來賢守是詩人久欽樂廣懷披霧
一見周瑜勝飲醇海內期公黃閣老尊前容我白綸巾
佳篇咀嚼真堪飽此日何憂覬有塵

同家弟用前韻謝判府惠酒

銜杯樂聖便稱賢無酒猶堪卧甕間使者在門催僕僕
駕車入夢正班班不煩白水真人力來自青城道士山
千載王弘全並美未應杞菊賦寒慳

日飲知非貧士宜要逃語穿稅心鞭

楚辭心鞭
羈而不亂

所須唯

酒非虛語以醉為鄉可徑歸鸚鵡盧鷦鷯俱得道螟蛉蜾
蠃共忘機狂言戲作麻姑送無奈閻人與我違

卷四十三

宋詩鈔卷四十三

總校官庶吉士臣張能照
校對官庶吉士臣陳墉

謄錄監生臣章浴曾